

AD
PERILLVSTREM ET EXCELLENTISSIMVM
DOMINVM
PETRVM NICOLAVM
NOVIGARDIVM
L. B. A GARTENBERG

SERENISS. ET POTENTISS. POLON. REGIS ELECT. SAXON.
CONSILIARIVM ET SVPREMVM METALLIFODINIS
FRIBERGENS. PRAEFECTVM

ODE
QVA PIVM GRATVMQVE ANIMVM PALAM
TESTARI VOLVIT
TANTO NOMINI

ADDICTISSIMVS
PAVLVS BERNARDI F. VIDALINVS
ISLANDVS

LIPSIAE
EX OFFICINA BREITKOPFII
MDCCCCLV.





Maecenatae atavis regibus edito
 O longe melior dignior et coli,
 Cui frontem decus et gloria nobilem
 Circumdat propriis parva laboribus.

Heu! quam difficile est, quod tua praestitit
 Virtus, Pallados ac Pieridum domos
 Spretis quisquiliis scandere ad arduas!
 Hoc est curriculo vincere Olympia
 Certe maius opus, quam quod equus ferox
 Aurigaeue leues perficiant minae.

Currentum remorae mille tenent pedes,
 Aut fallens oculos umbra trahit boni.

Nati patricio sanguine saepius
 Musas despiciunt: ast humili loco

Queis prodire dedit Parca timent diem,
Nec sublime valent tollere lumina.

Hunc si sollicitat magna pecuniae
Vis, aut laetus ager, formaue virginis,
Ne perdat quod habet, quod cupit vnicum,
Deterret solidis a studiis metus.
Illum praefidiis si simul omnibus
Res angusta domi nudat et opprimit,
Quid pugnare iuuat? fractus et impotens
Detrectat Clarii militiam dei.

Qui quaestum sequitur vel titulos leues,
Mercedem ante diem cum tulit, euehit
Se gaudetque datis officii immemor.
Qui non vana petit, sed patriae decus
Auro carius et commoda publica,
Nec soli, vt pecudes, viuere vult sibi:
Mens recti manet hunc conscia praemium,
Quam postquam misero corpore liberam
Diuinis animis iunxerit Atropos,
Ast hic dignus erat, forte aliquis bonus
Dicat, quem melius sidera ducerent,
Neu pressum sinerent tot mala perpeti.

Plures nil, alii discere gestiunt
Profectura parum: fors aliis negat
Sudoris pretium, nec meritis fauet.
Paucos aequus amat Iupiter et piis
Miscet coelicolis; munera parcius
In terra sapiens distribuit suis.

A doctrinae adytis haec populum sacris
Arcent: nam stolidi nil bene sentiunt
Prae lucri illecebris atque libidinum:
Sed fortuna fere sternit humi probos:
Quam siquis superat, rebus, vt Hercules,
Humanis merito creditur altior.

Victorem properat cingere frondibus,
GARTEMBERG I amor et deliciae deum,
TE Daphne: properat Calliope nouo
Laudes, ecce! TVAS dicere carmine.

TE magnum Iouis, at me TVA gratia
Felicem faciet. Quae TIBI ludere
Indocti gracilis fistula nititur
Si non displiceant, inque clientibus
Si TANTI numerer vel minimus VIRI:
Quamuis hoc fugiant pulchrae ederae caput,
Quamuis cuncta inopem destituant: erit
Hic ingens honor, hae diuitiae mihi.

